



Орган Лемковского Союза.

Выходит в каждый четверг.

Редакция и администрация в Крыници. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

Также просиме присылати членскы вкладкы до Лемко-Союза.

Просиме присылати материал до календара на рок 1936.

Росписанє выборов до Сейма и Сената.

„В Дневнику Законов” с дня 15 липня 1935. было оголошене зарядженє Президента Річипосполитой с дня 15 липня 1935, в ділі росписаня

Выборов до Сейма на день 8 вересня
и
до Сената на день 15 вересня.

Содержанє того зарядженя єст слідующе: „На основі арт. 9 уст. 1 ордынации выборчой до сейма (Дн. З. Р. П. с 1935 р. Ч. 47. поз. 319) заряджам выборы до сейма и вызначам день голосованя на 8. вересня 1935 р.

Дійства выборчи мают быти выполнены в терминах, означеных в выборчом календарі, приложенем до того зарядженя.

Тото зарядженє єст контрасыгноване через председателя рады министров В. Славека, министра внутренних діл, Марьяна-Зындрам Косцялковского и министра правосудя, Чеслава Михаловского.

Содержанє зарядженя - росписуючого выборы до сената єст таке саме.

Одночасно опубликовано календар дійств выборчих, звязаных с приготвленєм до выборов до обох законодательных палат.

В силу оголошеного, дня 15. липня зарядженя Президента Р. П. о назначеню термина выборов до сейма и сената, покликано дня 16. липня генерального комисара выборчого и єго заступника.

Генеральным комисаром выборчим назначено судю Найвысшого Суда, Станислава Гижицкого, а єго заступником - судю Адама Хехлинского. Оба назначены переводили уж выборы до Сейма и Сената в р. 1930.

Аджек выборы уж блиско. По выборчом календарі, выборчи коллегии мают назначити

кандыдатов до дня 14. серпня, в виду чого спис кандыдатов буде обявленный за три неділі. Як довідуєме ся, єст наміренє во всіх округах, до котрых входит лемковске населенє, выставити также наших кандыдатов. Выбор их залежит от нас самих. Если мы при тых выборах выкажемє, же мы освідомлены наших цілей и рушимє вшиткы до выборчой урны, если каждый с нас, старый и молодой, здоровый и хворый, отдаст свой голос на своего кандыдата, в таком случае, выбор своих послов в тых округах може мати великы виды успіха, если знова мы отнесемє ся до выборов ровнодушно и не сорганизуемє ся належито — то, — річ зрозуміла, — провалимє ся.

Як перейдут выборы.

Уж вшиткы политычны группы высказали ся, яке положенє займут при приближаючих ся выборах до сейма и сената. Полскы социялисты и народна партия польска т. зв. „людовцы” с под знака „Пяста” рішили не принимати участи в выборах и своих одномышленников не допустити до отдаваня голосов. Таксамо отрицательно мают отнести ся до выборов украинскы социялисты радыкалы. Другы партии украинскы рішили принять участь в выборах и старати ся допровадити до выборчой урны якнайбольше количество выберателей.

Таксамо руска организованна общественность рішила принять активну участь в выборах.

Ніт над чом и у нас призадумовати, бо каждый с нас знає, што то не лем наше право, але и долг ити до выборчой урны и своим голосом высказати свою волю.

Право тото можеме використати добре при тых выборах, коли сильны политычны группы польскы бойкотуют выборы, бо если у них єст напавду така сила, о якой они пишут в своих газетах, то населенє с многих польских сел вздержит ся от голосованя, а тым самым число голосов рускых може выстарчити до выбора посла. Именно тот факт бойкота выборов через даякы группы польскы, ділає тоты выборы барз важными и если тепер не використамє належито того момента, то напевно на долги часы останемє без своего представителя в законодательных палатах. А Выбор посла не єст важный через самого посла, бо мы віримє, же каждый депутат має обовязок представляти интересы цілого населеня без взгляда на национальность, але он єст важный сам через себе, бо світ довідує ся, же на якомси терені жиє организована национальна група, котра представлят силу, с котром треба ся доконче числити. Тото обстоятельство явят ся при выборах найважнішим фактором и тоты причины повинни заохотити нас всіх явити ся в день выборов перед выборчом комисіом и сполнити свой гражданский обовязок.

Тому, уж завчасу треба устроювати по селах собрания, представляти на тых собраниях важность выборов, организовати в каждом селі десятников, котры мали бы обовязок переглянути выборчи листы, внести реклямации, если дакого в них не поміщено, заохотити и в разі потреби припровадити, або аж и привезти пред комисію выборчу своих сусідов и тым самым причинити ся до того, штобы при выборах не бракло ани одного голоса.

ПОМІЩАЙТЕ
ОГОЛОШЕНЯ
В ГАЗЕТІ „ЛЕМКО”

О нашей бурсі.

С певностью, што многы наши люди хтіли бы дашто довідати ся о нашей одынокой на Лемковщині бурсі и ей воспытанниках. Прото подаме коротке справозданє за 1934/35 школьный рок.

В том році в Руской Бурсі в Горлицах было 21 учеников, в том 15 ходило до гимназии, а 6 до народной школы. Тых 21 воспытанников походят с слідующих сел: Лосє — 5, Ропа — 3, Смерековец, Ганцова и Усте Руске по 2, Чорне, Новица, Пантна, Высова, Квятонь, Избы и Сквиртне по 1. За удержанє в бурсі ученики платили ріжно, от 10 зл. до 40 зл. в місяц, в залежности от стану маєткового их родичей; а оден ученик — сирота был принятый лем за 7 зл. місячно. Самопонятно, што за тых, котры мали векши знижки бурса доплачивала с власных фондов и пожертвовань добрых людей, — бо полне удержанє одного ученика саму бурсу коштує выше 35 зл. місячно. Ест то впрочем обовязок бурсы и ей статутарна ціль: помагати способным, а бідным ученикам. Обязок тот выполняла она в міру можностей. Треба также зазначити, што дакотры села горлицкого повіта пришли с помочом выділови бурсы, бо пожертвовали дерево, картофлі и т. д. Также многы наши интеллигенты добровольно обложили ся місячным податком, котрый вплачивали на „удержанє бідного воспытанника”. Тото вшитко, як также запомогы и доходы с аренды поля, дали возможность бурсі не лем выйти без дефицита, але и сплатити праві в цілости старый, довоєнный ище долг ипотечный в банку.

Ученики получали в бурсі отвѣтне помешканє, добрый, здоровый викт, нялежну опеку и учили ся свою историю и руский язык. Поступы в науці робили на загал добры, лем 2 ученики будут змушены повторяти клясу, с чого оден по причині долшой хвороты. Вступный экзамен до I кл. гимназии здавало 2 (оден с Лося, а другой новый ученик с Завадки Рыман. пов. Кросно). Оба они испыт здали и сут приняты до гимназии.

Веденє бурсы, так ей воспытательна, як и господарча часть, были в руках професоров місц. гимназии г. В. Кордасевича и г. Р. Максимовича, котры поступали згодно с указаниями и инструкциями выділа бурсы. Хором бурсы управлял ученик VII кл. Б. Соболевский. Кухньом занимала ся П. Пыж с Вапенного при помочи прислугы.

При бурсі ест просторый яринный грод, сад и боиско до забав.

На 1935/36 р. шк. кромі бывших воспытанников внесло прошенє до бурсы уж 5 новых и то дакотры с дальших повітов. Ест то барз радостне явленє, але треба бы ище постарати ся о больше число новых учеников. При векшом числі бурса буде могла дати значнійши знижки и тым облегчит многым бідным ученикам.

Звертаме ся адже до родичей способных дітей с сердечным призывом: посылайте их до школы, отворте им очи на світ, отдайте их до нашей бурсы в Горлицах, а не пожалуєте коштов и трудов!

Памятайте што ученє — світ, а неучтво — тьма.

Информации уділят г. Н. Юрковский, упр. школы в Сквиртном, п. Усте Руске. На его руки можна также вносити поданя.

Биланс світовой войны.

Недавно вышла с друку книжка Гастона Бодара п. т. „Світова война в цыфрах”, где представлено найвірнійше с вшиткых дотеперешных статыстик, килько жертв кошовала памятна нам світова война. Варто запознати ся с дакотрыма числами.

Вшиткых мобилизованных было 70 миллионов, с чого 45 мил. по стороні Антанты (Россия 15, Англия 9, Франция 8, Италия 5, Америка 4, Румыния 1, Сербия и т. д.), а 25 миллионов по стороні центральных держав (Німеччина 13, Австрия 9, Турция 2, Болгария 1). Всего убито на войні 10 миллионов люда, а то 6 мил. по стороні Антанты (Россия 1700 тыс., Франция 1400 тыс., Англия 900 тыс. и т. д.) и 4 мил. по стороні цеентр, бльоку (Німеччина найбільше 1900 тыс., Австрия 1600 тыс., Турция 350 тыс. и т. д.). В процентном отношені найбільше стратила Сербия, бо 53 % вшиткых мобилизованных.

Война тревала 1532 дней, а же за тот час убито 10 мил. то пересічно на 1 день убито 6.400 люда!

Наибольше кровопролитном битвом была ани не Марна (ит. фр.), ани не Верден (франц. фр.), лем бытва состоявшя ся перед самым концем войны, медже 21.III. а 6.IV. 1918 р. на німецком фронті. Антанта и Німеччина стратили там разом 400 тыс. т. зн. по 50 тыс. падало в 1 день.

Вшиткых раненых по войні остало ся 26 миллионов, с них 8 миллионов калік.

При том вшитком сут ище звіры в людской скорі, котры мечтают о войні!



ПОПРАВМЕСЯ!

(Писмо в редакцію).

Я простый хлоп и не знам, ци потрафлю так написати, як редакторы, тож даруйте. Але хцу порушити одну справу, котра мя барз заболіла.

Утішил-єм ся страшно, як донесли газеты, што будут будовати памятник о. декану П. Сандовичу и его сынови розстріляным в 1914 р. в Санчі и што перенесут их тіла до Брунар. Справом том я заинтересовал ся, бо уважам за барз важну. Был ем в світі и знам, што вшитки народы чтят свято память своих героєв, своих мучеников. Ци-ж мы малибы отстати от культурных народов?

Оголошуют в газетах списы, кто и вельо дал на тоту ціль. Видиме, же жертвы идут помалы и то по векшой части от интеллигенции; хлопов в тых выказах мало. Ци так ма быти? Ой ніт, мы перши, хоц с невелькыма лептами, повинни там быти! Если памятник має быти даром руского народа для своего мученика, то лем просты люди, повинни в першой мірі заняти ся збором пожертвовань и помочи комитетови сполнити его задачу. А покойны мученики Сандовичи заслужили на то, жебы зме заняли ся том справом!

Помогли зме поставити величавый памятник жертвам Талергофа во Львові, читаме с газет, што Перемышль собрал вельку суму на талерг. памятник у себе, а и численны села на долах уж поставили такы памятники, а у нас што?

Сердечно взывам вас, братья селяне-лемкы, бодай грошами причинити ся до отданя чести и хвалы тым, што жите свое отдали за наш народ! — Сам я посылам 2 зл. на тоту ціль и обіцюю заняти ся збором в своем селі.

Зробте и вы так! И то вшиткы, без огляда на то, ци поминаме на Службі Дионизия, ци Василия, — бо вшиткы зме руснакы и жертвуйме на возвеличенє рускых мучеников.

Поправме ся доконче!

Простый.



Коли выбухне война италянско-абисынска.

В голяндском місті, Шевенинген, обрадовала под крылами Лигы Народов комиссия угодова италянско-абисынска. От самого початку торгы ишли тяжко, бо италянцы хотіли выторговати якнайвече, а абисынчики не хотіли нич дати, аж 9. липня комиссия перервала нарады на неограниченый час.

Нарады розбили ся о справу пустынной землі пограничной, званой Уал-Уал. Представитель Абисынии доказовал, же земля тотя здавен-давна належит до Абисынии, а представитель Италии спротивил ся тому и обставал при том, же земля тотя входит в склад граничных с Абисыниом италянских земель. Абисынчик хотіл ся пак годити, але италянцы отшмарили всякы помыслы погоды.

В Италии горячши политыкы жадають, штобы начати войну с Абисыниом уж 25. серпня, не озираючи ся совсем на рішенє Лигы Народов, котра має ся собрати в вересні.

Весельчакы наигравають ся с Лигы Народов, же она довідат ся о выбуху войны — с газет. Пожиєме — увидиме.



Призыв по ділу памятника жертвам войны в Талергоф.

В числі 23. с 13 червня 1935. р. американской газеты „Світ” помістил православный архиепископ Адам Филиповский призыв по ділу поставленя памятника на кладбищі в Талергоф, где под так зв. „соснами” лежит 1750 наших замученых собратов.

В призыві том архиепископ Адам подає, же был в р. 1926. в Талергоф и там познакомил ся с завідующим военными кладбищами в Стырии, полковником Ванино, от которого довідал ся о том, же Австрия намірят поширити поле для авиационных вправ и знести совсем тоту кладбище. Недавно архиеп. Адам достал от полковника Ванино писмо, в котром полковник доносит ему о том, што по поводу перебудовы талергофской долины и поширеня авиационного поля кладбище „под соснами” буде знесене, погребены там тіла мучеников будут перенесены в одну велику могилу, над котром буде поставленный достойный памятник.

В писмі том полковник Ванино зазначат, што его власти не распоряджают потребныма средствами, штобы поставити достойный

артистычний пам'ятник с выкутыма в камені іменами всіх умерших и прото он звертат ся тым путем до родин умерших за жертвами на поставленє такого пам'ятника и наконец просит дати ему знати, ци Стырийский Заряд охорони военных кладбищ може числити на грошеву поддержку на тоту ціль.

Архиеп Адам отвітил от себе, што наши Братя, емигранты, постарают ся всіма силами внести жертвы для увіковичення памяти наших мучеников и помістил в газеті „Світ“ призыв, в котром звертат ся до всіх священников, организаций и поодынокых людей творити талергофскы комитеты, котры заняли бы ся збором жертв на пам'ятник в Талергофі.

Правда, у нас тепер тяжкы часы, але ци не находиме мы и тепер гроша, коли заходит того конечна потреба; ци не выдаеме мы грошей на крестины, весіля и похороны, — ци не выдаеме их нераз на забаву и непотребны річи? А там в далеком німецком краю лежат кости наших отцов братов и сестер, там, як пише полковник Ванино, єст 1750 могил, в котрых почивают невинны мученикы за свою віру и свое Руске Имя.

На наш стыд и ганьбу, мы не могли через двадцет літ достарати ся хочбы о скромный пам'ятник и треба было, штобы аж німец призывал нас до сполненя нашого долга. Ци и тепер, коли уж австрийскы власти рішили знести тоту кладбище и затерти слід мук нашего народа, мы дальше маме отнести ся равнодушно и откладати наш долг отдати честь народным мученикам? Ци уж не отозве ся ничие сердце аж и втотчас, коли самы німцы, тоты самы, котры в своєй военной завзятці, шкалили нас и мучили, тепер сами преклоняют свои головы перед мученичеством тых невинных жертв и хотят поставити над их общим могилком скромный пам'ятник? Циж - бы уж совсем замерло у нас почутє обовязка в виду померших наших предков?

Нехай такє забытє не зганьбит нашей славы! Поспішме и мы со своим лептом, штобы не скромный, але достойный пам'ятник - каплица станул над том могилком наших мук и страдань. Жертвуйме лепты всі без ріжниц религиозных, бо там лежат мученикы не за віру, але за свое Руске Имя. Организујме и у нас по приміру наших славных Братов - емигрантов комитеты и займиме ся збором жертв на отданє чести памяти наших отцов, братов и сестер, замученых невинно и отдавших свою жизнь за дороге нам всім Руске Имя, а коли жертвами нашими стане пам'ятник - церковца, ідме, кто лем зможе, яко богомольцы на могилу тых, котры любили горячо свой народ, за народ отдали жизнь, а ненавистна рука не позволила ани помолити ся за их души.

Роль посла в Сеймі.

До того часу посол на Сейм был рядовым якуси партии и мусіл поступати так, як ему приказала партийна власть.

Сейм, зложеный с таких послов не мог дійствовати справно и принести загальнодержавной користи, бо посол роботничий уважал за свой святыи обовязок вести бор-

бу с промыслом, посол выбранный через промысл вел борбу с роботниками, посол с міста виділ свою кривду в том, єсли признано даякы запомогы або льготы селу, а посол с села относил ся ворожо до справ городских. Тот природный недостаток объективизма при рішаню ріжных діл общественных розрастал ся ище больше, єсли ходило о инвестыции в ціли господарчого поднесеня краю. Втотчас послы не числили ся с загальными потребами державы, але каждый посол, старал ся выторговати дашто для своего повіта, воеводства, або, што ище планьше, для своей партии, бо знал, же лем в том случаю найде признательность у своих выберателей. При тых торгах не звертано увагы на то, где заходит правдива потреба, ани на материяльны возможности державы, лем каждый посол дер, што ся дало, для своего терену, штобы приподобати ся выберателям.

При таком поступованю послов найгорше выходили тоты стороны, котры не выбрали своих послов до Сейма, бо не было кому домагати ся для них заспокоєня правдивых потреб. Так было нменно с нами. Лемкы не мали своего представителя в Сеймі и прото, хоц може нигде не докучала людем біда так, як в тых прекрасных, але бідных горах, не можна было дождати ся никакой помочи. Потреба вложеня капитала в наши горы єст правдива, конечна и користна не лем для жителей тых гор, але и для державы. Наши горы своим красотом можут притягнути великы масы туристов и літников, але потреба передом побудовати дороги, котрыма можна бы было выгодно достати ся до каждого села. Выдаток на тоты дороги єст конечный и принесє користь населеню и державі; передовсем при роботах тых найдут заробок численны ряды сельских безработных, оживит ся торговельный рух, люды отрясут ся с біды и начнут платити податкы, котрых тепер многы не платят, бо не маот чим.

Але помимо тых правдивых потреб, дотепер мало кто интересовал ся нашими горами, бо мы не мали своих представителей в Сеймі, а дотеперешны послы старали ся лем приподобати своим одиномышленникам партийным

ТАК БЫЛО ДАВНІЙШЕ, А ТЕПЕР?

Послы маот быти представителями не лем той части населеня, котра их выбрала, але маот они заступати ціле населенє державы. Прото, стараючи ся о добро своего терена, новы послы маот обовязок дбати одночасно о добро загальне. Новый посол не буде выбранный через якуси партию, але свой мандат одержит завдякы довірю цілого населеня и тым самым воля цілого населеня доходит при новых выборах до верхов державной власти.

Тото охоронит нас в будучности перед демагогием с одной стороны и перед бюрократием со стороны другой, а то прото, бо сейм буде найбарже непосредном репрезентациом населеня и одночасно общественным органом контролі роботы выконательных властей.

Роль посередна посла не буде односторонна. Буде он репрезентовати справы населеня в виду державы, а также справы державы в виду населеня. За єго посередництвом люды довідают ся о справах державных, а власти державны о потребах людей.

Силом факту найсильнйше будут репрезентованы тоты версты населеня, котрых єст в державі найвєце, то єст селяне, притом будут выбераны лем такы люды, котры тішат ся загальным довірем села, люды порядны и приличны.

Вшиткы крикачи, комбинаторы, спекулянты и карьеровичи найдут ся при тых выборах поза сеймом и прото они так сильно выступают против новой выборчой ордынации.

НОВЕ ПРИСТАНИЩЕ НА КРЫНИЦКОЙ ЯВОРИНІ.

На крыницкой Яворині, найвысшой горі Средных Бескидов (1116 м. н. у.) побудовано нове пристанище місцевого Отділа П. Т-ства Татрянского. Пристанище стоит на поляні на высоті 1030 м. и має власну агенцию почтову, котра належит до найвысше положеных агенций в Польщі.

Пристанище тішит ся великом фреквенциом не лем туристов, але и літников, приіхавших на літний отдых вакационный.

До того часу был под Яворином малый захыст турыстычный, котрый мог помістити ледво пару людей в барз примитивных условиях. Роснучий літний и зимушный рух турыстычный домагал ся будовы нового пристанища. Потребу тоту заспокоєно, бо нове пристанище може помістити 60-ро люда.

Нове пристанище має велике значенє для дальшого розроста літной и зимушной турыстыкы на прекрасных убочах Яворины.

Каліны можут голосовати через полномочников.

При новых выборах до сейма и сената введено одну зміну, а именно: каліны и люды хворы, котры не можут сами зайти перед комисию выборчу в ціли отданя голоса, можут уполномочити другого до отданя за них голоса.

Новый воевода в Кракові.

Воеводом краковском на місце перенесеного до Познаня воеводы д-ра Николая Квасневского єст заименованный г-н Владыслав Рачкевич, бывший министр внутренних діл, б. воевода виленский и бывший маршал Сената Річипосполитой.

В часі „Свята Гор“ будут желізнодорожны знижки в высоті 70 %.

Министерство Комуникации признало всім участникам, котры захотят поіхати на „Свята Гор“, до Закопаного желізнодорожны знижки со всіх жел.-дор. станции до Закопаного и с поворотом в высоті 70 %.

Знижки можна достати за оказанєм карты участництва от дня 15. липня во всіх делегатурах повітовых Комитета „Свята Гор“, містячих ся при староставах, а также в отділах бюр подорожи „Орбис“.

Свята гор буде тревати от 4 до 11. серпня т. р.

Што чути в світі.

Кытай под водом. В послістві уливних дощей выляла ріка Янк-Тсе-Киянг, попереувала тамы и заляла великы пространства землі. От наводнення утерпіло 96 кораблей и утонуло 100 тысяч людей. Вода знищила понад 1 миллион.

В Испании дощи вырядили великы шкоды. Найвеце потерпіла Астория, где выляла ріка Циданес и знищила совсем землеплоды. Торы желізнодорожны попереуваны, дороги понищены, много домашних звірят утонуло.

В Совітах, на терені Білоруси, появили ся банды партизантов, котры пападають на самоуправны инстытуции совітскы. В районі Витебска убили килькох работников колхоза. Банды появили ся также в округах борысовском и оршанском, где занотовано также убийства.

В Австрии, коло Линца, убила ся в послістві автобусной катастрофы жена канцлера Шуснинга. Сам канцлер, его сын и дочка вышли с катастрофы с незначныма ранами.

Япония дає пожичку Манджурии в высоті 30 миллионів єн. Пожичка єст перезначена на заплату Совітам належной сумы за выкуплену полночно-манджурску желізну дороту.

В Франции правительство Лявала выдало 28 декретов, маючих на ціли удержати ровновагу бюджетну. Обнижено пенсии урядникам и поднесено податкы и таким способом хоче правительство ошадити около 11 миллиардов франков.

Премиєр прускый Геринг выдал роспорядженє, в котром выступат против католицкым священникам в Німеччині и заповідат репресии в виду тых священников, котры будут выступати агресивно против народо-социальной державі німецкой.

В Англии пораз перший зроблено пробу с аероплянами без летчиков и задемонстровано новы тыпы армат противлетничих. Аеропляны водны, котры атаковали кораблі, не мали залогы и были керованы фалями радиовыма. Помимо того, же не было на гыдроплянах летчика, ани залогы, сполняли они точно свои задачи. Лем оден гыдроплян упал, але и он передом сполнил наложену роботу.

Комунистычна демонстрация во Відні, котру старала ся урядити група комунистов, была полициом опанована. Арестовано 73 люда.

В Парижі помер полковник Альфред Драйфус, герой славного процеса, котрый тревал от 1894 до 1906 року.

Бельгия и Совіты навязали медже собом дыпльоматычны отношеня и заявили, же обі стороны будут ся старати утревалити мир и поднести господарчи отношеня.

Амерыка будеє 800 новых самолетов войсковых. Кошты будовы тых самолетов обчисляют на 40 миллионів долларов.



Вісти с краю.

Коло Вильна арестовано властителя фольварка Т. Лынкевича, за того, же подраблял 10 злотовы монеты польскы.

В Варшаві арестовано шестох желізнодорожных касиєров, котры выдавали купуючим билеты решты фалшивыма монетами.

Коло Крыницы напали на повертаючого вечером с Мушины, Стефана Мрожка и побили его так сильно палками, же переломили ему щекы. Полиция до того часу не выслідила виновников.

Народный Комитет Украинский Ундо во Львові оголосил ухвалу, же украинцы в воєводствах львовском, тарнопольском и станиславовском приймут участь в выборах. Украинцы робят уж горячковы приготовления передвыборчи.

Украинскы послы с Волыни, Певный, Скрипник и сенатор Маслов, были у премиєра Славека и заявили, што приймут участь в выборах и пойдут до выборов разом с польскым населенєм.

В Менцині коло Лимановы подпалил Войцех Дудзик дом своего сусіда, Антония Пулита, за того, же Пулит не пожичил ему зерна.

ТРАДЫЦЫЙНЫЙ ТАНЦОВАЛЬНЫЙ ВЕЧЕР, КОТРЫЙ УСТРЮЮТ РУСКЫ СТУДЕНТЫ В СЯНОКІ,
СОСТОИТ СЯ ДНЯ
3. серпня 1935 р.
В САЛІ НАРОДНОГО ДОМА.

Комитет просит всіх рускых людей явити ся численно. Запрошеня можна достати от Комитета при касі в день забавы.

КОМИТЕТ.

Фатально помылил ся бандыт, Станислав Копиняк, котрый напал на власного отца, вертаючого возом с торго до дому. Копиняк не познал отца початково и побил его. Тепер отец боронил сына перед судом в Варшаві, подаючи, же не мог по поводу темноты познати напастника, але суд не дал віры той обороні и засудил Копиняка на 2 роки тюрьмы.

УПРАВА ЧИТ. ИМ. М. КАЧКОВСКОГО
В ВОРОБЛИКУ КОРОЛЕВСКОМ
УСТРОЮЄ ДНЯ 28 Т. М. (НЕДІЛЯ)
ЮБИЛЕЙНЕ ТОРЖЕСТВО 10-ТИ ЛІТЯ
ОТНОВЛЕНЯ ДІЯТЕЛЬНОСТИ ЧИТАЛЬ-
НИ ПО ВОЙНІ (1925—1935) И СОРОК-
ЛІТНЫЙ ЮБИЛЕЙ ЄЙ ОСНОВАНЯ

В програму входят :

- 1) О год. 9-той рано Служба Божя и панихида за помершима членами читальні.
 - 2) О год. 3-той пополудни Академия, на котру зложат ся доклады, деклямації и співы.
 - 3) Вечером місцевый аматорскый кружок отограт веселу комедию, по котрой отбуде ся танцовальный вечер.
- Управа Читальні просит всіх рускых людей с доокрестных сел о численну участь. — (Подписана управа читальні).

В РОСТОЦІ ВЕЛИКОЙ, НОВОСАН-
ДЕЦКОГО ПОВІТА
ОТБУДЕ СЯ

ДНЯ 28 ЛИПНЯ 1935 р.

О ГОД. 2-гой ПОПОЛУДНИ

Открытє Читальні

имени Мих. Качковского,

НА КОТРЕ ТЫМЧАСОВЕ ПРАВЛЕНЄ
ПРОСИТ ВСЮ РУСКУ ИНТЕЛИГЕН-
ЦИЮ, ОБЩЕСТВА, ХОРЫ И ОР-
КЕСТРЫ С ДООКРЕСТНЫХ СЕЛ.

УВАГА

КРЫНИЦКЫЙ МІШАНЫЙ ХОР ПОД
ДЫРЫГЕНТУРОМ
Г-НА АЛЕКСАНДРА РОПИЦКОГО
даєт
в салі Здрового Дома в Кры-
ниці, в понеділок дня 29 липня
о год. 20 1/2

КОНЦЕРТ ЛЕМКОВСЬОХ ПІСЕНЬ

Кто хоче почути наравду красный
спів, нехай прийде, а напевно не
пожалує труда.